

TATA IBADAH

Pesta Olob-olob Jemaat

GKPS PADANG BULAN – RESORT POLONIA



09 AGUSTUS 2020

Tema:

“Tbohali Manghobaskon Horja na Madear” (2 Timoteus 3:17)

Subtema:

**“Pasirsir ma Kuria in Gabe Sipambobai na Toruh Maruhur,
Sihabiari Naibata, Sibalosi Ajar, ibagas Biak na Madear, ase
Lambin Tarbarita Goran ni Kristus”**

(Mateus 5:18-19, Markus 9:35)

1. Votum – Introitus – Tonggo

P

: Riap ma hita jongjong!

Ibagas Goran ni Naibata Bapa, pakon Tuhan Jesus Kristus, ampa Tonduy Na Pansing, Sitompa langit pakon tanoh on. Amen.

Balosi nasiam ma Tuhan in ibagas malas ni uhur, roh ma nasiam hu lobei-Ni marhasoman olob-olob.

K : Botoh nasiam ma, Jahowa, Ia do Naibata, Ia do na manompa hita, Ia do simada hita, bangsa-Ni anjaha biri-biri na pinarmahan-Ni.

P : Masuki nasiam ma horbangan-Ni marhitei hatarimakasihon.

K : Sonai alaman-Ni marhitei puji-pujian. Martarimakasih ma nasiam Bani, puji nasiam ma goran-Ni!

P : Ai pardear layak do Jahowa.

K : Ronsi sadokah ni dokahni do idop ni uhur-Ni, anjaha marsundut-sundut do hasintongan-Ni.

P : Tongon ronsi sadokah ni dokahni do idop ni uhur-Ni. Haleluya, Haleluya, Haleluya

P+K : (Mandodingkon) Haleluya...Haleluya...Haleluya P

: Martonggo ma hita!

Tarpuji ma Ham Tuhan na mambere haluahon bannami marhitei pardas ni Ambilan Na Madear 117 tahun na dob salpu. Dear ni in pambahenan-Mu na mambobai hanami humbani parjabolonan ni dousa masuk hubani haliharon. Marhitei ibadah pakon pesta olob-olob on, sihol do uhurnami ase lambin ipabayu Ham uhur ampa pingkirannami, ase haganup dunia on mambotoh bahasa pitah Ham hansa Naibata na patut ipuji anjaha isombah. Jalo Ham ma hanami riap pakon tonggo ampa pamujionnami in. Ibagas Jesus Krsitus ipadas hanami tonggo ampa pamujionnami on. Amen.

2. Mandoding Haleluya No. 408 :1-2

Haleluya puji ma Tuhan, pasangap marhiteihon gondrang na laingan Irandu inggou na lurlur homa tangaron.

Dodingkon ma doding na baru, puji ma Ia bai hotak-Ni na i babou Janah olobkon ma riap marmalas uhur.

Sai tarbarita baen goran-Ni, gok halongangan ganup jadi-jadian-Ni Puji Tuhan Haleluya.

Marmegah gok tarima kasih, Halani ganup pasu-pasu 'ge layak-Ni Hubanta na totap sirsir tong mambalosi.

Tunggung tumang do tong Tuhanta, Ia do Raja ni ganup sagala raja Ningon hu Bani do unduk ganup marsombah.

Sai tarbarita baen goran-Ni, gok halongangan ganup jadi-jadian-Ni Puji Tuhan Haleluya.

3. Hasasapan ni Dousa

- P** : Riap ma hita jongjong! Martonggo ma hita, sopotkon hita ma dousanta hubani Tuhan Naibata. Ham Tuhan Naibata Bapanami na i nagori atas, paridop ni uhur mangidah hanami. Na roh do hanami jolma pardousa on hu lobei-Mu, mansopthon dousanami na buei in
- K** : Ham Tuhan Naibata, hotop do hiranana hasoman na mangarapkon pambahenan na madear humbnami. Goluhnami gati do lang romban hubani hasintongan, hapintoran ampa hapansingon. Halani ai do ase roh hanami hu lobei-Mu mansopotkon dousanami.
- P** : Ham Tuhan, 117 tahun ma marhorja Ambilan Na Madear in janah ipabotokkon Ham hubani kuria-Mu, ai ma na hinalojahon ni ganup suruhan-Mu, tarlobih ma sidea para misionaris na roh hun siou na madaoh, hun Jerman.
- K** : Tapi gati tumang do lang ihargahon hanami hata-Mu in.
- P+K** : Ham Bapa, holong ma uhur-Mu, marpangulaki ma uhur-Mu mangidah hanami pardousa on.
- P** : Gati do lepak parsahapnami sonai pangabaknami. Lang hata-Mu ipakei hanami gabe rigapan ibagas na mandalani ari-ari ni goluhnami.
- K** : Halani ai ma ase hotop hanami kahou ampa magou, halani na lang isuhuni hanami ajar pakon ojur-Mu.
- P+K** : Ham Bapa, holong ma uhur-Mu, marpangulaki ma uhur-Mu mangidah hanami na doyuk on.
- P** : Igoran do tahun 2020 on Tahun Kepemimpinan yang Berkarakter i GKPS. Marhitei tema tahun on, iparsinta do ase ganup hita gabe sipambobai na toruh maruhur, sihabiari Naibata, sibalosi ajar, ibagas biak na madear, ase lambin tarbarita goran ni Kristus.
- K** : Halani gap mamingkiri hagobiron na masa sonari, gabe gati ma lang tontang pangahapnami, halani ai ma hanami lang sompat mamingkiri pasal kepemimpinan yang berkarakter nidokan ai. Sonaha ma hanami nani i lobei-Mu Tuhan?
- P** : O Tuhan Naibata parholong atei, paondos Ham ma holong-Mu na marisi pengampunan in bannami ase ulang lanjar lalab soh hanami bani hahurangannami.

P+K : Holong ma Ham Tuhan, sai marpangulaki uhur-Mu mangidah hanami.

P : Nasiam hasoman na hinarga ni Tuhan. Buei do horja na lepak halani pardousaonta hubani Naibata ronsi bani hasoman jolma. Tapi nini hata in: "halak na mananda dousani ampa na manolsoli, janah na mansopothon ai hubani Naibata, ia do na dapotan hasasapan ni dousa". Amen.

Tangar anjaha haporsayai hita ma Hata ni Naibata, bagah-bagah pasal hasasapan ni dousa na tarsurat bani Tangis-tangis 3:22-23.

Idop ni uhur ni Jahowa do na so ra marpunsa, seng marnarotap holong ni ateiNi. Mulak ratah do ai siap sogod, bangga do habonaron-Mu.

Ibagas holong ni Naibata, domma isasap haganup dousanta. Halani ai, pataridahkon hita ma tanda-tanda ni pargoluhon na bayu. Hasangapon ma bani Naibata i babou.

K : Amen.

4. Persembahan Pujian : St.Martina Girsang 5.

Mandoding "O Naibata na Sangap na Mapansing" Lagu :

KJ. 64 "Bila Kulihat Bintang Gemerlapan"

O Naibata na sangap na mapansing, Sitompa langit pakon tanoh on
Anggo huidah jadi-jadianMu, majagiah manggoki tanoh on
Reff.: Marolob-olob au mamuji Ham, O Naibata sangap do Ham (2x)

Ham Jesus Kristus Tuhan na gok holong, manasap dousa ni dunia on
Ai ambit lang Ham gabe rupeinami, hu hamagouan ganup hanai on
Reff. : Marolob-olob au mamuji Ham, O Naibata sangap do Ham (2x)

Ham o Tonduy Napansing parmaloi, sai pargogohi Ham hanami on
Ajari Ham ase pentar hanami, marmudumudu goluh na sintong
Reff. : Marolob-olob au mamuji Ham, O Naibata sangap do Ham (2x)

6. Tekad Parolob-oloban

P : Hita haganupan, mamungkah humbani tahun 1903 domma ondos banta Ambilan Na Madear in. Domma mardalan hita bani haliharon na hun babou anjaha ibere do banta hagoluhan na lambin marbanggal ibagas holong na humbani Naibata marhitei Kristus Jesus Raja ni gareja in. Anggo sonai aha ma sibahenonta?

- Bapa** : Gabe malim ma tongon hanami i tongah-tongah ni keluarga anjaha gabe usihan pasal na madear, gabe sipamboboa na toruh maruhur bani keluarga i tongah-tongah ni haganup pargoluhannami. Songon pangakuan ni si Josua ai do age pangakuannami, “Anggo ahu pakon hasomanku sarumah, Jahowa do sibalosannami.”
- Inang** : Gabe sihabiari Naibata ma hanami, lambin magodang sonai ge lambin matoras ma hanami ibagas haporsayaon. Lambin martanggung jawab ma hanami bani ganup tugas pakon tanggung jawab selaku inang, na boi ihaporsyai anjaha gabe sipartonggo i rumah tangganami.
- Niombah** : Bani haposoonnami sihol dihut do homa hanami mangkorjahon harosuh ni Tuhan. Sirsir mambalosi ajar, totap ibagas biak na madear. Ra ma hanami gabe suruhan ni Tuhan in laho mangidangi ase lambin tarbarita goran-Ni Kristus.

(mandodingkon doding Haleluya 381:2)

Ringgas au mangkatahon hatani Tuhan in, Buei do halongangan humbani na hinan. Dihut ma au marulih bai hasonangan in, janah huhaporluhon mangambilankon in. Tongtong do marmulia, barita ni Tuhanta, sai lambin tarambilan goranni Tuhan in.

7. Manaksihon Haporsayaon

- P** : Riap ma hita jongjong! Saksihon hita ma haporsayaonta in songon na sinaksihon ni ganup halak na porsaya bani sab tanoh on!
- P+K** : Ahu porsaya bani Naibata Bapa, Pargogoh na so tarimbang, na manompa langit pakon tanoh on. Ahu porsaya bani Jesus Kristus, Anak ni Naibata na sasada in, in do Tuhanta, na tinubuhkon ni si Maria sanggah nape haliaban, marhitei tonduy na pansing. Na manaron na parngit, bani panorang ni si Pontius Latus, iparsilangkon, matei anjaha itanom, turun hu nagori toruh. Mulak manggoluh humbani na matei bani ari patoluhon. Naik hu surga anjaha hundul i siamun ni Naibata Bapa, Pargogoh na so tarimbang in. Hunjai ma la mulak magira laho manguhumi halak na manggoluh pakon na dob matei. Ahu porsaya bani tonduy na pansing, bani kuria parsadaan na mapansing in, parsaoan ni sagala na mapansing in, bani hasasapan no dousa, bani parpuhoon ni angkula, pakon bani hagoluhan na sadokah ni dokahni. Amen! (hundul kuria)

8. Acara khusus

- Mandodingkon kanon Olob-olob
- Mambasa Surat Tongosan ni Pimpinan Pusat GKPS - Tingting + Tonggo Pangapition

SAI BOBAI
Kanon Olob-Olob 2020

Es=1 4/4

The Inson's

①	3	$\overline{3}$	2	$\overline{2}$		1	7	1	.		
	Sai	bo	-	bai		ha	-	na'i	Tu	-	han
②	3	$\overline{3}$	5	$\overline{5}$		4	2	3	.		
	Man-	dom-	pak-	kon		na	bo	-	rat		
③	5	$\overline{6}$	7	$\overline{7}$		6	4	5	.		
	Rap	-	'kon	Ham		ha	-	na'i	to	-	tap
④	1	$\overline{1}$	3	$\overline{3}$		2	7	1	.		
	'Se	tong-	tong			ha	-	na'i	so	-	nang

* Idodingkon lobei riap sahali dob ai kanon piga-piga hali

9. Mandoding Haleluya No. 499:1, 4

Panorang olob-olob, sai roh ma hita ganupan.
Riap ma mangolobkon, Ambilan na ondos banta
Domma liar nuan ganup i kehen in, 'ge i huluan.
In ma kuasa ni Hata-Ni Tuhan in, mandilo hita.
Pongkut ma manangihon, hata ni siparambilan.
Usihan ni suruhan, mambobai ganup hulanan.
Domma liar nuan ganup i kehen in, 'ge i huluan. In
ma kuasa ni Hata-Ni Tuhan in, mandilo hita.

10. Ambilan: Kolosse 3:22-25

11. Patumpu Galangan Parambilan

:

Paima iondoskon hita galanganta, tangar hita ma lobei hata ni Naibata na gabe onjolan banta laho manggalang, aima na tarsurat bani: Heber 13:16: "Mambahen na madear ampa marsibere-bere, ulang ma halupahon nasiam ai, ai galangan na sonai do iharosuhkon Naibata". Sonari ondoskon hita ma galanganta!

P +K : Mandodingkon : Mandoding Haleluya No. 488 : 1 – 2 Pesta
 bolon marpariama, ganup hasoman parjuma in
 In ma da na ringgas marhorja manuan omei i juma-Niin
 Sai marmegah mangolobkon, goranni Tuhanta in
 Parsimada bai hagoluhan, idopni uhur tumang do in Pesta
 bolon marpariama, na mangirikhon Tuhanta in
 In ma da na ringgas marhorja, mangambilankon hata-Niin
 Sai marmegah mangolobkon, goranni Tuhanta in
 Parsimada bai hagoluhan, idopni uhur tumang do in.

12. Tonggo Galangan - Tonggo Panutup – Pasu-pasu

- P : Riap ma hita jongjong!
 Ham Tuhan, domma 117 tahun ondos Ambilan Na Madear i tongah-tongah ni kuria-Mu,
 gabe talar ma panandaionnami hu Bamu ronsi holong-Mu. Holong-Mu in
 mambobai uhur pakon pingkirannami kuria-Mu laho patalarhon use holongMu
 in, ase gok holong goluhnami anjaha gabe pasu-pasu hanami.
 K : Aima padannami Tuhan, pargogohi Ham ma hanami pasaudkon padan in
 P : Nai ma tongon gabe padan na hot ma in sadokah goluhnami. Malas ma uhurnami
 janah sai marodor ma na madear sibahenonnami, ase bani ganup goluhnami
 totap hanami marbuah ampa martuah
 P+K : Amen, sai saud ma sonai
 P : Ham Tuhan, bani pesta olob-olobnami sadarion, domma ipatumpu hanami
 galangannami huBamu, in ma galangan malas ni uhurnami. Jalo anjaha pasupasu
 Ham ma in ase mangodorhon horja na madear janah patambah haporsayaonnam
 kuria-Mu.
 K : Lanjar pasu-pasu Ham ma goluh pakon horjanami bei hu lobeian ni ari on, ase
 lambin unduk hanami manggalangkon dirinami ampa sinadongannami hu Bamu
 P : Marhiteihon ganup pasu-pasu na jinalonami, totap ma riap hanami roh marsombah
 huBamu irik manaurhon doding pamujionnami. Sai jalo Ham ma hanami, janah malas
 ma uhur-Mu manjalohon galangannami. Tuhan. Amen K : (*Mandodingkon Hal. No.
 281:5*)
*Bamu o Tuhan, manambah au on. Bamu ganupan na dong bangku on
 Seng bulih be sirang na rapat Bamu. Martuah sai sonang, na roh hu Bamu*
 P : Ham Tuhan Naibata Bapanami marhitei Jesus Kristus na marholong ni atei
 bannami. Tarima kasih ma isombahkon hanami Bamu, halani na dob ondos
 hataMu in bannami, gabe itanda hanami Ham janah masuk hanami hu bagas
 harajaon-Mu anjaha marulih bani hagoluhan na pinarsirsir ni Anak-Mu Jesus

Kristus Tuhannami. Pasu-pasu Ham ma ganup horja ni siparambilan ronsi haganup badan-badan zending na gabe mitra ampa utusan-Mu laho marugas i tengah-tongahnami. Pasu-pasu Ham ma hata-Mu na dob ondos hubani kuria-Mu sadari on, ase marhorja ma hata-Mu in padoraskon semangatnami marhobas bani horja harusuh ni uhur-Mu bani pardalanan ni goluhnami. Amen.

Ham Bapanami na i nagori atas. Sai na papansing ma goran-Mu! Sai roh ma harajaon-Mu. Sai saud ma harusuh ni uhur-Mu i nagori tengah on songon na i nagori atas! Bere Ham ma bannami sadari on hagoluhan ari-ari. Sasap Ham ma dousanami songon panasapnami bani dousa ni hasoman na mardousa dompak hanami! Ulang hanami bobai Ham hu parlajouan! Paluah Ham ma hanami hun bani pangagou!

K : *(Mandodingkon)*

Ai Ham do simada harajaon, pakon hagogohon ampa hasangapon sadokah ni dokahni.

P : Laho ma nasiam, janah, "Hupabangkit do hanima, ase laho hanima marbuah, anjaha ase totap buahnima ai, ase ibere bannima sagala sipindoonnima humbani Bapa in marhitei goran-Ku" (Johanes 15:16)

Jalo nasiam (*hita*) ma pasu-pasu humbani Tuhan Naibata:

Ipasu- pasu anjaha iparorot Tuhan Naibata ma ham (*hita*). Isondangkon Tuhan Naibata ma bohini hu bamu (*hu banta*). Janah maidop ma uhur-Ni mangidah ham (*hita*). Idompakhon Tuhan Naibata ma bohi-Ni hu bamu (*hu banta*). Janah ipasorap ma damei-Ni bani tonduymu (*tonduyta bei*). Amen.

K : *(Mandodingkon)* Amen... Amen... Amen.

GALANGAN MINGGU PAKON AMPLOP PESTA OLOB-OLOB JEMAAT
HUMBANI KELUARGA:

Galangan I : Rp.

Galangan II : Rp.

Galangan III : Rp.

Amplop : Rp.